

# Seri Paduka, PM hantar kawat takziah

**KUALA LUMPUR, Rabu** — Yang di-Pertuan Agong dan Perdana Menteri, Datuk Seri Dr. Mahathir Mohamad, hari ini melahirkan rasa terkejut dan sedih atas kematian Presiden Anwar Sadat dari Mesir.

Dalam perutusan takziah mereka kepada Pemangku Presiden Mesir, Dr. Soufi Hassan Abu Taleb, kedua Seri Paduka dan Perdana Menteri mensifatkan Encik Sadat sebagai seorang pemimpin yang agung.

Dalam perutusannya, Seri Paduka bertitah betapa sedihnya baginda mengetahui kematian Presiden Sadat, seorang pemimpin rakyat Mesir dan tokoh dunia.

Pemergiannya akan dirasakan bukan sahaja oleh rakyat Mesir tetapi juga di seluruh dunia, titah Seri Paduka.

## Terkejut

Yang di-Pertuan Agong juga bertitah menyampaikan rasa simpati dan takziah kepada keluarga Presiden Sadat.

Datuk Seri Dr. Mahathir dalam perutusannya berkata, rakyat Malaysia bersama-sama rakyat Mesir menanggung rasa terkejut dan sedih atas kematian Presiden Sadat.

Dengan pemergiannya, Mesir kehilangan

seorang pemimpin agung dan seluruh dunia ketiadaan seorang negarawan, katanya.

Sumbangan Encik Sadat kepada perjuangan kemerdekaan Mesir akan sentiasa mendapat tempat yang mulia dalam sejarah Mesir, tambahnya.

Datuk Seri Dr. Mahathir menyampaikan takziah kepada rakyat Mesir dan keluarga Presiden Sadat.

Sementara itu, Kedutaan Mesir di Ibu Negara akan menyediakan buku ucapan takziah untuk ditandatangani oleh orang ramai Jumaat dan Sabtu ini sebagai memperingati kematian trajis Presiden Sadat.

Buku itu akan dibukakan kepada orang ramai mulai jam 9.30 pagi hingga 12.30 tengah hari dan 2.30 petang hingga 5 petang pada hari Jumaat dan mulai jam 9.15 pagi hingga 1.00 tengah hari Sabtu.